



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎԻ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 – 840, (+374 60) 830 850

Էլ-փոստ՝ info@competition.am, վեբ կայք՝ <http://www.competition.am>

«25» 09 2023թ.
No 00 8528

ՖԻԶԻԿԱԿԱՆ ԱՆՁ

ՊԱՐՈՆ ՆՈՐԻԿ ԹՈՐԳՈՄԻ ՊԵՏՐՈՍՅԱՆԻՆ

(հասցե՝ ՀՀ, ԿՈՏԱՅՔԻ ՄԱՐԶ, ԱԿՈՒՆՔ, Փ. 12, ՏՈՒՆ 1)

Հարգելի՛ պարոն Պետրոսյան,

Մրցակցության պաշտպանության հանձնաժողովը (այսուհետ՝ Հանձնաժողով) 2023 թվականի սեպտեմբերի 19-ին ընդունել է ««Թեղուտ» փակ բաժնետիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի նկատմամբ պատասխանատվության միջոց կիրառելու մասին» թիվ 415-Ա որոշումը (այսուհետ՝ **թիվ 415-Ա որոշում**), որի 4-րդ կետով ֆիզիկական անձ Նորիկ Թորգոմի Պետրոսյանի նկատմամբ նշանակվել է տուգանք 2 000 000 (երկու միլիոն) ՀՀ դրամի չափով:

Տեղեկացնում ենք նաև, որ.

1. թիվ 415-Ա որոշմամբ նշանակված տուգանքը ենթակա է վճարման Հանձնաժողովի 900005024147 հաշվեհամարին.

2. թիվ 415-Ա որոշմամբ նշանակված տուգանքի 75 տոկոսը որոշման ուժի մեջ մտնելուց հետո՝ երկամսյա ժամկետում, վճարելու դեպքում տուգանքի վճարման պարտականությունը համարվում է պատշաճ կատարված.

3. թիվ 415-Ա որոշման 4-րդ կետով դրանով նշանակված տուգանքը մինչև թիվ 415-Ա որոշման անբողոքարկելի դառնալը չվճարելու դեպքում ենթակա է հարկադիր կատարման՝ «Դատական ակտերի հարկադիր կատարման մասին» օրենքով սահմանված կարգով:

4. Հանձնաժողով փաստաթղթեր ներկայացնել և ստանալ, ինչպես նաև Հանձնաժողովի հետ հետագա ողջ հաղորդակցությունը կարող եք իրականացնել նաև առցանց՝ Հանձնաժողովի e-Compete էլեկտրոնային համակարգի (այսուհետ նաև՝ Համակարգ) միջոցով, որի համար անհրաժեշտ է գրանցվել Համակարգում՝ մուտք

գործելով Հանձնաժողովի պաշտոնական կայքի (www.competition.am) «Իմ էջը» բաժին,
ընտրելով «Գրանցվել» հրամանը և լրացնելով անձի նույնականացման համար
պահանջվող տվյալները:

Կից ուղարկվում է թիվ 415-Ա որոշման պատճենը:

Առդիր՝ «21» թերթ:

ՀԱՐԳԱՆՔՈՎ՝



ԱՇՈՏ ՎԱՀԱՆՅԱՆ

Համակենտրոնացումների, պեղական օժանդակության և
պեղական գնումների վերահսկողության բաժին
Կադարող՝ Աննա Կոստանյան
Հեռ. (+374 60) 830 840 (233)



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

Ո Ր Ո Շ ՈՒ Մ

19 սեպտեմբերի 2023 թվականի թիվ 415-Ա

«ԹԵՂՈՒՏ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ԵՎ ՖԻԶԻԿԱԿԱՆ ԱՆՁԻՆՔ ՆՈՐԻԿ ԹՈՐԳՈՄԻ ՊԵՏՐՈՍՅԱՆԻ ՈՒ ՊԱՎԵԼ ԿՈՐԻՉՆԵՎԻ ՆԿԱՏՄԱՄԲ ՊԱՏԱՍԽԱՆԱՏՎՈՒԹՅԱՆ ՄԻՋՈՑ ԿԻՐԱՌԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2023 թվականի սեպտեմբերի 19-ի նիստում, քննարկելով «Թեղուտ» փակ բաժնետիրական ընկերության (այսուհետ նաև՝ «Թեղուտ» **ընկերություն**) և ֆիզիկական անձինք Նորիկ Թորգոմի Պետրոսյանի ու Պավել Կորիչնևի նկատմամբ պատասխանատվության միջոց կիրառելու մասին հարցը,

Պ Ա Ր Զ Ե Ց

1. Վարույթի ընթացքի հակիրճ նկարագրությունը.

Հանձնաժողովը 2023 թվականի մարտի 28-ի ««Թեղուտ» փակ բաժնետիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից տնտեսական մրցակցության բնագավառում իրավախախտումների վերաբերյալ վարույթ հարուցելու մասին» թիվ 136-Ա որոշմամբ հարուցել է թիվ ՀԳ-01206/23 վարույթը՝ (այսուհետ նաև՝ **Վարույթ**) առերևույթ չհայտարարագրված և արգելված համակենտրոնացման դրսևորմամբ «Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) խախտումների հատկանիշներով:

Հանձնաժողովը 2023 թվականի հունիսի 27-ին ընդունել է ««Թեղուտ» փակ բաժնետիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի վերաբերյալ թիվ ՀԳ-01206/23 վարույթի ժամկետը երկարաձգելու մասին» թիվ 301-Ա որոշումը:

2. Վարույթի հարուցման առիթի և հիմքի հակիրճ նկարագրությունը.

Հանձնաժողովի մրցակցության գնահատման և վերահսկողության վարչության համակենտրոնացումների, պետական օժանդակության և պետական գնումների վերահսկողության բաժնի կողմից 2023 թվականի մարտի 23-ին ներկայացվել է զեկուցագիր՝ 2019 և 2020 թվականներին «Թեղուտ» ընկերությունում տեղի ունեցած անուղղակի բաժնետերերի փոփոխությունների վերաբերյալ:

Մասնավորապես՝ ֆիզիկական անձ Նորիկ Թորգոմի Պետրոսյանը 2019 թվականի դեկտեմբերի 20-ին դարձել է «Թեղուտ» ընկերության 25,05 տոկոս անուղղակի բաժնետերը (այսուհետ նաև՝ **Գործարք 1**), այնուհետև ֆիզիկական անձ Պավել Կորիչնևը 2020 թվականի փետրվարի 17-ին դարձել է «Թեղուտ» ընկերության 25,00 տոկոս անուղղակի բաժնետերը (այսուհետ նաև՝ **Գործարք 2**):

Գործարք 1-ից և Գործարք 2-ից հետո «Թեղուտ» ընկերության անուղղակի բաժնետերերն են՝

1. «ՎՏԲ Բանկ» հանրային բաժնետիրական ընկերությունը (ՌԴ) 49,95 տոկոս անուղղակի մասնակցությամբ,
2. ֆիզիկական անձ Նորիկ Թորգոմի Պետրոսյանը 25,05 տոկոս անուղղակի մասնակցությամբ,
3. ֆիզիկական անձ Պավել Կորիչնևը (ՌԴ) 25,00 տոկոս անուղղակի մասնակցությամբ:

Հանձնաժողովը, հաշվի առնելով, որ Գործարք 1-ի և Գործարք 2-ի կնքմանը նախորդող վերջին ֆինանսական տարում «Թեղուտ» ընկերության ակտիվների արժեքը և հասույթի չափը գերազանցել են Հանձնաժողովի 2021 թվականի նոյեմբերի 9-ի «Հայտարարագրման ենթակա համակենտրոնացումների մասնակիցների ակտիվների և հասույթների չափերը, համակենտրոնացման հայտարարագրման կարգը և հայտարարագրի ձևը սահմանելու և Տնտեսական մրցակցության պաշտպանության պետական հանձնաժողովի 2016 թվականի դեկտեմբերի 16-ի թիվ 478-Ն որոշումը ուժը

կորցրած ճանաչելու մասին» թիվ 322-Ն որոշման (այսուհետ նաև՝ **Թիվ 322-Ն որոշում**) հավելված 1-ով սահմանված ակտիվների արժեքը և հասույթի չափը, «Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի նկատմամբ հարուցվել է Վարույթը՝ առերևույթ չհայտարարագրված և արգելված համակենտրոնացման դրսևորմամբ Օրենքի խախտումների հատկանիշներով:

3. «Թեղուտ» փակ բաժնեիրական ընկերության դիրքորոշումը.

Վարույթի շրջանակներում «Թեղուտ» ընկերությունը 2023 թվականի հունիսի 30-ին Հանձնաժողով է ներկայացրել դիրքորոշում, մասնավորապես նշելով, որ ելնելով Օրենքի նպատակից՝ անհրաժեշտ է փաստել, որ դրա կարգավորման դաշտը ներառում է Հայաստանի Հանրապետության տարածքը, և ի թիվս այլնի՝ նպատակն է պաշտպանել և խրախուսել տնտեսական գործունեության ազատությունը, ազատ տնտեսական մրցակցությունը և ապահովել բարեխիղճ մրցակցության համար անհրաժեշտ միջավայր: Հաշվի առնելով, որ գործարքները կնքվել են Հայաստանի Հանրապետության սահմաններից դուրս, նշված գործարքները ուղեկցել են համապատասխան մասնագետներ, որոնք և, ուսումնասիրելով գործարքների նկատմամբ կիրառելի օրենքները, որևէ պահանջ կամ առաջարկություն չեն ներկայացրել գործարքների հայտարարագրման անհրաժեշտության վերաբերյալ: «Թեղուտ» ընկերությունը տեղի ունեցած գործարքների վերաբերյալ, ինչպես նաև հիմնադիրների, շահառուների, մասնակիցների փոփոխության վերաբերյալ տեղեկատվություն չի ունեցել: Նշված տեղեկատվության վերաբերյալ «Թեղուտ» ընկերության կողմից կատարվել են հարցումներ՝ իրական շահառուների բացահայտման կարգավորումները սահմանող ՀՀ օրենքի պահանջը կատարելու նպատակով:

Միաժամանակ նշվել է, որ գործարքները ուղղակիորեն կամ անուղղակիորեն որևէ ազդեցություն չեն ունեցել Հայաստանի Հանրապետությունում գործող այլ տնտեսավարող սուբյեկտի որոշումների կայացման կամ մրցունակության վրա, կամ ուղղակիորեն կամ անուղղակիորեն ազդել մեկ ուրիշի որոշումների կայացման կամ մրցունակության վրա, ինչը հաստատվում է նաև այն փաստով, որ մինչ օրս նշվածի հետ կապված որևէ խնդիր չի ծագել և տնտեսական մրցակցության վերաբերյալ վարույթ չի հարուցվել: Նշվել է նաև, որ Օրենքի 2018 թվականի խմբագրությամբ 8-րդ հոդվածի 5-րդ կետի համատեքստում «ազդեցություն» բառը օգտագործվում է բացասական իմաստով, սակայն հարկ է նշել, որ տվյալ գործարքները ազդեցություն չեն ունեցել այլ տնտեսավարող սուբյեկտի նկատմամբ և այս գործարքների արդյունքում որևէ տնտեսավարող սուբյեկտի մրցակցությունը չի սահմանափակվել:

«Թեղուտ» ընկերության դիրքորոշմամբ՝ պետք է գնահատել այն հանգամանքը, արդյոք գործարքները մրցակցային իրավիճակի վրա առաջացրել են բացասական ազդեցություն, հաշվի առնելով, որ ինքնին գործարքի կնքումը չի ենթադրում համակենտրոնացում, այլ ենթադրվում է, որ այն առկա կլիներ, երբ նշվածի արդյունքում մրցակցային իրավիճակի վրա կլինի բացասական ազդեցություն, կազդի այլ տնտեսավարող սուբյեկտի մրցունակության վրա կամ կդրսևորվի գերիշխող դիրքի չարաշահում, ինչպիսի հանգամանքները սակայն առկա չեն:

Հաշվի առնելով վերոգրյալը, «Թեղուտ» ընկերությունը խնդրել է կարճել թիվ ՀԳ-01206/23 վարույթը:

Վարույթի շրջանակներում ֆիզիկական անձինք Նորիկ Թորգոմի Պետրոսյանը և Պավել Կորիչնևը Հանձնաժողով դիրքորոշում չեն ներկայացրել:

4. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

Վարույթի շրջանակներում Հանձնաժողովի նախագահի թիվ ՄՊՀ-002727/28-03-2023 գրությամբ «Թեղուտ» ընկերությունից պահանջվել է Հանձնաժողով ներկայացնել հետևյալ տեղեկատվությունը՝

- 2018 թվականին «ՎՏԲ Բանկ» հանրային բաժնետիրական ընկերության (ՌԴ) կողմից «Թեղուտ» ընկերության 100 տոկոս անուղղակի սեփականատեր դառնալու հիմքերը, հիմնավորումները,

- ֆիզիկական անձ Նորիկ Թորգոմի Պետրոսյանի կողմից 2019 թվականի դեկտեմբերի 20-ին «Թեղուտ» ընկերության 25,05 տոկոս անուղղակի սեփականատեր դառնալու հիմքերը,

- ֆիզիկական անձ Պավել Կորիչնևի կողմից 2020 թվականի փետրվարի 17-ին «Թեղուտ» ընկերության 25,00 տոկոս անուղղակի սեփականատեր դառնալու հիմքերը:

«Թեղուտ» ընկերությունը 2023 թվականի ապրիլի 14-ին՝ ի պատասխան թիվ ՄՊՀ-002727/28-03-2023 գրության, նշել է, որ «Թեղուտ» ընկերությունը չի տիրապետում պահանջվող տեղեկատվությանը: Միաժամանակ նշվել է, որ ուղարկվել են համապատասխան գրություններ Նորիկ Թորգոմի Պետրոսյանին և Պավել Կորիչնևին՝ տեղեկությունները ստանալու նպատակով, սակայն պատասխան չեն ստացել:

Հանձնաժողովի նախագահի թիվ ՄՊՀ-002726/28-03-2023 գրությամբ ֆիզիկական անձ Նորիկ Թորգոմի Պետրոսյանից պահանջվել է Հանձնաժողով ներկայացնել հետևյալ տեղեկատվությունը.

- 2019 թվականի դեկտեմբերի 20-ին Նորիկ Թորգոմի Պետրոսյանի «Թեղուտ» ընկերության 25,05 տոկոս անուղղակի սեփականատեր դառնալու հիմքերը, փայաբաժնի ձեռքբերման պայմանագրի պատճենը,

- այն ընկերությունների մասին տեղեկություններ (անվանումը, գրանցման տվյալները, փաստացի գործունեության ոլորտները, գործունեության մանրամասն նկարագրերը), որտեղ Նորիկ Թորգոմի Պետրոսյանը կամ իր հետ Օրենքի 4-րդ հոդվածով անձանց խումբ հանդիսացող ֆիզիկական անձինք որևէ ձևաչափով ունեն փոխկապվածություն կամ վերահսկողություն, ուղղակի կամ անուղղակի մասնակցություն՝ կցելով համապատասխան փաստաթղթերը:

Հանձնաժողովի նախագահի թիվ ՄՊՀ-002725/28-03-2023 գրությամբ ֆիզիկական անձ Պավել Կորիչնևից պահանջվել է Հանձնաժողով ներկայացնել հետևյալ տեղեկատվությունը.

- 2020 թվականի փետրվարի 17-ին Պավել Կորիչնևի «Թեղուտ» փակ բաժնետիրական ընկերության 25,00 տոկոս անուղղակի սեփականատեր դառնալու հիմքերը, փայաբաժնի ձեռքբերման պայմանագրի պատճենը,

- այն ընկերությունների մասին տեղեկություններ (անվանումը, գրանցման տվյալները, փաստացի գործունեության ոլորտները, գործունեության մանրամասն նկարագրերը), որտեղ Պավել Կորիչնևը կամ իր հետ Օրենքի 4-րդ հոդվածով անձանց խումբ հանդիսացող ֆիզիկական անձինք որևէ ձևաչափով ունեն փոխկապվածություն կամ վերահսկողություն, ուղղակի կամ անուղղակի մասնակցություն՝ կցելով համապատասխան փաստաթղթերը:

Հանձնաժողովի նախագահի թիվ ՄՊՀ-002726/28-03-2023 գրությունը հետ է վերադարձվել Հանձնաժողով 2023 թվականի ապրիլի 3-ին՝ «չի պահանջվել» հիմքով: Նշված գրությունը 2023 թվականի ապրիլի 11-ին հրապարակվել է <https://www.azdarar.am> կայքում և Հանձնաժողովի պաշտոնական կայքում՝ ապահովելով Օրենքին համապատասխան գրությունը հասցեատիրոջը պատշաճ հանձնելու կարգը:

Վարույթի շրջանակներում Հանձնաժողովին հասանելի է դարձել նաև տեղեկություն, որ Նորիկ Թորոսյանի Պետրոսյանի էլեկտրոնային հասցեն է norik.t.petrosyan@gmail.com, ուստի Հանձնաժողովի նախագահի թիվ ՄՊՀ-002726/28-03-2023 գրությունը 2023 թվականի հունիսի 8-ին ուղարկվել է նաև վերը նշված էլեկտրոնային հասցեով:

Հանձնաժողովի նախագահի 2023 թվականի մարտի 29-ի ՄՊՀ-002725/28-03-2023 գրությունը հետ է վերադարձվել Հանձնաժողով 2023 թվականի հունիսի 29-ին՝ «չի պահանջվել» հիմքով: Նշված գրությունը 2023 թվականի ապրիլի 11-ին հրապարակվել է <https://www.azdarar.am> կայքում և Հանձնաժողովի պաշտոնական կայքում՝ ապահովելով Օրենքին համապատասխան գրությունը հասցեատիրոջը պատշաճ հանձնելու կարգը:

Հանձնաժողովի նախագահի թիվ ՄՊՀ-005778/28-06-2023, թիվ ՄՊՀ-005775/28-06-2023 և ՄՊՀ-005776/28-06-2023 գրություններով համապատասխանաբար «Թեղուտ» ընկերությանը, ֆիզիկական անձինք Նորիկ Պետրոսյանին և Պավել Կորիչնևին ուղարկվել է թիվ ՀԳ-01206/23 վարույթի ժամկետը երկարաձգելու մասին որոշումը: «Թեղուտ» ընկերությունը գրությունը ստացել է 2023 թվականի հունիսի 30-ին, իսկ Նորիկ Պետրոսյանին և Պավել Կորիչնևին ուղղված գրությունները հետ են վերադարձվել՝ «չի պահանջվել» հիմքով: Հանձնաժողովի նախագահի թիվ ՄՊՀ-005775/28-06-2023 և ՄՊՀ-005776/28-06-2023 գրությունները համապատասխանաբար 2023 թվականի հուլիսի 7-ին և սեպտեմբերի 11-ին հրապարակվել են <https://www.azdarar.am> կայքում և Հանձնաժողովի պաշտոնական կայքում:

Հանձնաժողովի կողմից իրականացված ուսումնասիրության մասով.

Հանձնաժողովը դեռևս 2020 թվականին իրականացրել է ուսումնասիրություն մետաղական հանքարդյունաբերության ոլորտում, որն ընդգրկել է 2018 և 2019 թվականներն ընկած ժամանակահատվածը: Իրականացված ուսումնասիրության շրջանակում առանձնացվել են մետաղական հանքարդյունաբերության հետևյալ՝ «Պղնձի խտանյութ», «Մոլիբդենի խտանյութ և ֆերոմոլիբդեն», «Յինկի խտանյութ» և «Ոսկու խտանյութ, ոսկու և արծաթի համաձուլվածք» ենթաօլորտները:

Ուսումնասիրությունները ցույց են տվել, որ Հայաստանում արտադրվում և արտահանվում են ոչ թե զտված մետաղները, այլ դրանց խտանյութերը (պղնձի, մոլիբդենի, ոսկու, ցինկի և այլն), որոնք հիմնականում վերամշակվում են այլ երկրներում: Հանքանյութերը կարող են բաղկացած լինել ընդամենը մեկ մետաղից կամ մի շարք

տարբեր մետաղներից: Դրանք հիմնական մետաղներից բացի պարունակում են նաև մի շարք այլ ուղեկից օգտակար բաղադրիչներ, ինչպես օրինակ՝ ռենիում, սելեն, թելուր, ծծումբ, արծաթ և այլն, որոնց մի մասն է միայն կորզվում, մյուս մասը թափվում է պոչամբարներ, ուստի դրանց արժեքը խտանյութերի վաճառքի ժամանակ չի փոխհատուցվում:

Հաշվի առնելով մետաղական հանքարդյունաբերության ենթաոլորտներում արդյունահանվող հանքաքարերի և դրանցից ստացվող խտանյութերի ու այլ միջանկյալ արտադրանքների համադրելիության անհնարինությունը՝ կապված չափման միավորների, դրանց բաղադրության և որակական հատկանիշների տարբերության հետ՝ Հանձնաժողովի կողմից իրականացված ուսումնասիրության շրջանակում չեն հաշվարկվել ոլորտում կենտրոնացվածության մակարդակը բնութագրող գործակիցներն ու ինդեքսները:

Հանձնաժողովի կողմից իրականացված ուսումնասիրության համաձայն՝ 2019 թվականին հանքագործական արդյունաբերության և բացահանքերի շահագործման ոլորտի մասնաբաժինը ՀՆԱ-ում կազմել է 2,8 տոկոս: Ոլորտի համախառն ավելացված արժեքի փոփոխության դինամիկան 2015-2019 թվականներին հիմնականում պայմանավորված է եղել Թեղուտի հանքավայրի գործունեությամբ: Այսպես, հանքավայրի բուն շահագործումը մեկնարկել է 2015 թվականին, արդյունքում գրանցվել է հանքարդյունաբերական արտադրանքի ծավալի աճ՝ չնայած պղնձի համաշխարհային գների նվազմանը: Երեք տարի անց՝ 2018 թվականի հունվարին, արդյունահանման աշխատանքները դադարեցվել են՝ նվազեցնելով ոլորտի մասնաբաժինը ՀՆԱ-ում, և Թեղուտի հանքավայրը վերագործարկվել է միայն 2019 թվականին:

Գործնական և տնտեսական նշանակության տեսակետից կարևորվում է նաև մոլիբդենի դերը: Այն հիմնականում հանդիսանում է պղնձի արդյունահանման հավելյալ արտադրանք: Աշխարհի մոլիբդենի ընդհանուր պաշարների ավելի քան 6 տոկոսը գտնվում է Հայաստանում: Հանրապետությունում առկա մոլիբդենի հանքաքար պարունակող 6 հանքավայրերից վերջին տարիներին շահագործվում են միայն 3-ը (Քաջարանի, Ագարակի և Թեղուտի հանքավայրերը):

«Թեղուտ» փակ բաժնետիրական ընկերության մասով.

Հանձնաժողովում առկա տեղեկությունների համաձայն՝ «Թեղուտ» ընկերության կանոնադրական կապիտալի 100 տոկոս բաժնետոմսերը պատկանում են «Թեղուտ Ինվեստմենտս Լիմիթեդ» ընկերությանը (Կիպրոս): Ստորև ներկայացվել են Գործարք 1-ից և Գործարք 2-ից հետո «Թեղուտ» ընկերության անուղղակի բաժնետերերը իրենց մասնակցության չափով՝

1.

2. 25,05 տոկոս մասնակիցն է՝
ֆիզիկական անձ Նորիկ Թորգոմի Պետրոսյանը (ՀՀ),
3. 25,00 տոկոս մասնակիցն է՝
Պավել Կորիչնևը (ՌԴ):

Հանձնաժողովում առկա տեղեկությունների համաձայն՝

Արդյունահանող ճյուղերի թափանցիկության նախաձեռնության պաշտոնական կայքի տվյալների համաձայն՝ «Թեղուտ» ընկերությունը 2016-2021 թվականներին իրականացրել է պղնձի հանքաքարեր և խտահանքերի, մոլիբդենի խտանյութի արտադրություն և իրացում:

Աղյուսակ 2-ում ներկայացվում են պղնձի հանքաքարեր և խտահանքերի արտադրության ծավալները 2016-2021թթ.:

«Թեղուտ» ընկերության պղնձի հանքաքարերի և խտահանքերի արտադրության ծավալները 2016-2021թթ.

Տարեթիվ	Ծավալը	Չափի միավորը	Ընդամենը՝ արժեքը
2021	84 983	չմտ	40 615 139 344
2020	83 488	չմտ	36 533 021 211
2019	49 089	չմտ	17 340 367 104
2018	3 117	չմտ	2 155 746 119
2017	113 060	չմտ	36 397 330 417
2016	135 712	չմտ	38 046 417 413

Աղյուսակ 2-ից երևում է, որ «Թեղուտ» ընկերությունը 2016 և 2017 թվականներին արտադրել է համապատասխանաբար 135 712 և 113 060 չմտ պղնձի հանքաքարեր, այնուհետև արտադրության ծավալները կտրուկ նվազել են, այնուհետև՝ 2020 և 2021 թվականներին պղնձի հանքաքարերի և խտահանքերի արտադրության ծավալները համապատասխանաբար կազմել են 83 488 և 84 983 չմտ:

Աղյուսակ 3-ում ներկայացվում են մոլիբդենի խտանյութի արտադրության ծավալները 2016-2021թթ.:

**«Թեղուտ» ընկերության մոլիբդենի խտանյութի արտադրության
ծավալները 2016-2021թթ.**

Աղյուսակ 3

Տարեթիվ	Ծավալը	Չափի միավորը	Ընդամենը՝ արժեքը
2021	1 252	չմտ	3 981 847 142
2020	1 091	չմտ	3 166 098 196
2019	673	չմտ	1 674 535 527
2018	58	չմտ	227 708 156
2017	1 704	չմտ	3 314 440 808
2016	171	չմտ	290 861 800

Աղյուսակ 3-ից երևում է, որ մոլիբդենի խտանյութի արտադրության մեծ ծավալ է եղել 2017 թվականին՝ 1 704 չմտ, որից հետո արտադրության ծավալները նվազել են, այնուհետև 2021 թվականին մոլիբդենի խտանյութի արտադրության ծավալը կազմել է 1 252 չմտ:

Աղյուսակ 4-ում ներկայացվում են «Թեղուտ» ընկերության կողմից արտադրանքի արտահանման վերաբերյալ տվյալները: Մասնավորապես, «Թեղուտ» ընկերությունը 2016 և 2017 թվականներին պղնձի հանքաքարեր և խտահանքեր է արտահանել Վրաստան, 2017 թվականին նաև արտահանել է մոլիբդենի խտանյութ՝ արտահանման երկիրը Նիդերլանդներ: «Թեղուտ» ընկերությունը 2018 թվականին արտահանում չի ունեցել:

«Թեղուտ» ընկերությունը 2019-2021 թվականներին պղնձի հանքաքարեր և խտահանքեր, ինչպես նաև մոլիբդենի խտանյութ է արտահանել Շվեյցարիա:

«Թեղուտ» ընկերության արտահանման ծավալները 2016-2021 թթ.

Աղյուսակ 4

Արտադրատեսակները	2021թ.		2020թ.		2019թ.		Արտահանման երկրները
	Ծավալը / չմտ	Ընդամենը՝ արժեքը	Ծավալը / չմտ	Ընդամենը՝ արժեքը	Ծավալը / չմտ	Ընդամենը՝ արժեքը	
Պղնձի հանքաքարեր և խտահանքեր	82,721	76,938,581,546	86,515	51,161,868,245	44,888	25,526,530,619	Շվեյցարիա
Մոլիբդենի խտանյութ	768	5,488,398,563	853	2,419,260,261	746	3,271,733,104	Շվեյցարիա

Արտադրատեսակները	2018թ.		2017թ.		2016թ.		Արտահանման երկրները
	Ծավալը/ չմտ	Ընդամենը՝ արժեքը	Ծավալը/ չմտ	Ընդամենը՝ արժեքը	Ծավալը/ չմտ	Ընդամենը՝ արժեքը	
Պղնձի հանքաքարեր և խտահանքեր	0	0	73,849	45,964,204,390	94,916	47,024,383,049	Վրաստան
Մոլիբդենի խտանյութ	0	0	804	2,850,729,753			Նիդերլանդներ

Աղյուսակ 5-ում ներկայացված են ներքին շուկայում «Թեղուտ» ընկերության իրացման ծավալների վերաբերյալ տվյալները:

«Թեղուտ» ընկերության իրացման ծավալները ներքին շուկայում 2016-2021 թթ.

Աղյուսակ 5

Արտադրատեսակները	2021 թվական				2020 թվական			2019 թվական		
	Ծավալը/ չմտ	Ընդամենը իրացման արժեքը	Գնորդ կազմակերպությունը	Իրացման ծավալը	Ծավալը/ չմտ	Ընդամենը իրացման արժեքը	Գնորդ կազմակերպությունը	Ծավալը/ չմտ	Ընդամենը իրացման արժեքը	Գնորդ կազմակերպությունը
Մոլիբդենի խտանյութ	329	842,125,013	«ԱՖՁ Պրոդաքշն» ՍՊԸ	145	584	2,240,898,068	«ՕՋՖ Պրոդաքշն» ՍՊԸ	92	373,494,722	«ՕՋՖ Պրոդաքշն» ՍՊԸ
			«Մետալ Լայն» ՍՊԸ	183						

Արտադրատեսակները	2018 թվական			2017 թվական			2016 թվական		
	Ծավալը/չմտ	Ընդամենը իրացման արժեքը	Գնորդ կազմակերպությունը	Ծավալը/չմտ	Ընդամենը իրացման արժեքը	Գնորդ կազմակերպությունը	Ծավալը/չմտ	Ընդամենը իրացման արժեքը	Գնորդ կազմակերպությունը
Մոլիբդենի խտանյութ				573	2,026,289,512	«Ալափմետ» ՓԲԸ			
Պղնձի հանքաքարեր և խտահանքեր	3786	2,850,565,390	«Արմենիան Քափըր Փրոգրամ» ՓԲԸ	39636	23,108,704,617	«Արմենիան Քափըր Փրոգրամ» ՓԲԸ	40289	20,003,339,597	«Արմենիան Քափըր Փրոգրամ» ՓԲԸ

Աղյուսակ 5-ի համաձայն՝ «Թեղուտ» ընկերության կողմից 2017 թվականին մոլիբդենի խտանյութ է իրացվել «Ալափմետ» փակ բաժնետիրական ընկերությանը, իսկ 2019-2021 թվականներին՝ «ԱՖՁ Պրոդաքշն» (նախկին անվանումը՝ «ՕՋՖ Պրոդաքշն», կանոնադրական կապիտալի 100 տոկոս բաժնեմասը 2019 թվականից պատկանում է

Բորիս Սարգսի Մարտիրոսյանին) և «Մետալ Լայն» (2021 թվականին կանոնադրական կապիտալի 51 տոկոսը պատկանել է «ԱՖՁ Պրոդաքշն» ընկերությանը, իսկ 49 տոկոս բաժնեմասը՝ Կարեն Ռուբենի Գևորգյանին) սահմանափակ պատասխանատվությամբ ընկերություններին:

Հարկ է նշել, որ «Թեղուտ» ընկերությունը 2019-2021 թվականներին պղնձի հանքաքարեր և խտահանքեր ներքին շուկայում (ՀՀ այլ իրավաբանական անձանց) չի իրացրել:

Ներկայացված տվյալների համաձայն՝ 2016-2018 թվականներին «Թեղուտ» ընկերությունը պղնձի հանքաքարեր և խտահանքեր է իրացրել «Արմենիան Քափըր Փրոդրամ» փակ բաժնետիրական ընկերությանը: «Արմենիան Քափըր Փրոդրամ» փակ բաժնետիրական ընկերության կանոնադրական կապիտալի 100 տոկոս փայաբաժինը պատկանում է Վալերի Զանիբեկի Մեջլումյանին:

Այսպիսով, ամփոփելով վերը նշված տեղեկությունները, կարելի է նշել, որ «Թեղուտ» ընկերությունը գործունեություն է ծավալում «Պղնձի խտանյութ», «Մոլիբդենի խտանյութ և ֆերոմոլիբդեն» ենթաոլորտներում: «Թեղուտ» ընկերությունը 2016-2021 թվականներին իրականացրել է պղնձի հանքաքարեր և խտահանքերի, մոլիբդենի խտանյութի արտադրություն և իրացում: Թեղուտի հանքավայրի բուն շահագործումը մեկնարկել է 2015 թվականին և երեք տարի անց՝ 2018 թվականի հունվարին, արդյունահանման աշխատանքները դադարեցվել են: Թեղուտի հանքավայրը վերագործարկվել է 2019 թվականին, ինչպես նաև 2019 և 2020 թվականներին տեղի է ունեցել իրական շահառուների փոփոխություն:

«Թեղուտ» ընկերությունը 2016-2018 թվականներին պղնձի հանքաքարեր և խտահանքեր է արտահանել Վրաստան, միաժամանակ նշված ժամանակահատվածում «Թեղուտ» ընկերությունը պղնձի հանքաքարեր և խտահանքեր է իրացրել իր հետ փոխկապակցված «Արմենիան Քափըր Փրոդրամ» փակ բաժնետիրական ընկերությանը: 2017 թվականին մոլիբդենի խտանյութ է արտահանել Նիդերլանդներ, ինչպես նաև ներքին շուկայում իրացրել է «Ալափմետ» փակ բաժնետիրական ընկերությանը:

2019 թվականից հետո փոփոխվել են «Թեղուտ» ընկերություն ինչպես արտահանման երկրները, ներքին շուկայում իրացման ծավալները, ինչպես նաև ներքին շուկայում արտադրանքը ձեռք բերող տնտեսավարող սուբյեկտները:

Այսպես, «Թեղուտ» ընկերությունը 2019-2021 թվականներին պղնձի հանքաքարեր և խտահանքեր է արտահանել Շվեյցարիա, իսկ ներքին շուկայում իրացում չի ունեցել: Նշված ժամանակահատվածում մոլիբդենի խտանյութ է արտահանել Շվեյցարիա, իսկ ներքին շուկայում իրացրել է «ԱՖՁ Պրոդաքշն» և «Մետալ Լայն» սահմանափակ պատասխանատվությամբ ընկերություններին:

Թեև 2019 թվականից հետո հանքավայրը վերագործարկվել է և 2020-2021 թվականներին ավելացել են արտադրության և իրացման ծավալները, սակայն պետք է նշել, որ ներկայումս

Ֆիզիկական անձ Նորիկ Թորգոմի Պետրոսյանի մասով.

Հանձնաժողովում առկա տեղեկությունների համաձայն՝ ֆիզիկական անձ Նորիկ Թորգոմի Պետրոսյանը մասնակցություն ունի Հայաստանի Հանրապետությունում գրանցված հետևյալ ընկերություններում, նրան է պատկանում՝

Ֆիզիկական անձ Պավել Կորիչնևի մասով.

Ֆիզիկական անձ Պավել Կորիչնևի կողմից Հայաստանի Հանրապետությունում այլ ընկերությունների հետ փոխկապվածության, կանոնադրական (բաժնեհավաք) կապիտալում մասնակցության առկայության վերաբերյալ տեղեկատվություն Հանձնաժողովի կողմից չի հայտնաբերվել:

5. Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.

1. Ֆիզիկական անձ Նորիկ Թորգոմի Պետրոսյանը 2019 թվականի դեկտեմբերի 20-ին դարձել է «Թեղուտ» ընկերության 25,05 տոկոս անուղղակի բաժնետերը (**Գործարք 1**):

2. Ֆիզիկական անձ Պավել Կորիչնևը 2020 թվականի փետրվարի 17-ին դարձել է «Թեղուտ» ընկերության 25,00 տոկոս անուղղակի բաժնետերը (**Գործարք 2**):

3.

4.

5. «Թեղուտ» ընկերությունը իրականացնում է պղնձի հանքաքարեր և խտահանքերի, մոլիբդենի խտանյութի արտադրություն և իրացում:

6. Ֆիզիկական անձ Նորիկ Թորգոմի Պետրոսյանը մասնակցություն ունի Հայաստանի Հանրապետությունում գրանցված հետևյալ ընկերություններում, նրան է պատկանում՝

6. Վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

1) «Թեղուտ» փակ բաժնեպիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից իրավախախտում կատարված լինելու հարցի կապակցությամբ.

Գործարք 1-ի և Գործարք 2-ի իրավահարաբերության ծագման պահին գործող խմբագրությամբ Օրենքի 8-րդ հոդվածի 1-ին մասի 4-րդ կետի համաձայն՝ տնտեսվարող սուբյեկտների համակենտրոնացում է համարվում տնտեսվարող սուբյեկտի կողմից Հայաստանի Հանրապետությունում գրանցված այլ տնտեսվարող սուբյեկտի փայաբաժնի ձեռքբերումը, եթե դա ինքնին կամ ձեռք բերողին արդեն պատկանող փայաբաժնի հետ միասին կազմում է այդ տնտեսվարող սուբյեկտի կանոնադրական (բաժնեհավաք) կապիտալի 20 տոկոսը կամ ավելին:

Իրավահարաբերության ծագման պահին գործող խմբագրությամբ Օրենքի նպատակն է պաշտպանել և խրախուսել ազատ տնտեսական մրցակցությունը, ապահովել բարեխիղճ մրցակցության համար անհրաժեշտ միջավայր, նպաստել ձեռնարկատիրության զարգացմանը և սպառողների շահերի պաշտպանությանը Հայաստանի Հանրապետությունում:

Իրավահարաբերության ծագման պահին գործող խմբագրությամբ Օրենքի 8-րդ հոդվածի 1-ին մասի 5-րդ կետի համաձայն՝ տնտեսվարող սուբյեկտների համակենտրոնացում է համարվում տնտեսվարող սուբյեկտների ցանկացած գործարք, գործողություն, վերակազմակերպում կամ վարքագիծ, որի շնորհիվ տնտեսվարող սուբյեկտն ուղղակիորեն կամ անուղղակիորեն կազդի այլ տնտեսվարող սուբյեկտի որոշումների կայացման կամ մրցունակության վրա կամ կարող է ուղղակիորեն կամ անուղղակիորեն ազդել մեկ ուրիշի որոշումների կայացման կամ մրցունակության վրա:

Իրավահարաբերության ծագման պահին գործող խմբագրությամբ Օրենքի 8-րդ հոդվածի 5-րդ մասի համաձայն՝ փայաբաժնի ձեռքբերման դեպքում համակենտրոնացման մասնակիցներ են փայաբաժին ձեռք բերող տնտեսվարող սուբյեկտը և այն տնտեսվարող սուբյեկտը, որի կանոնադրական (բաժնեհավաք) կապիտալում փայաբաժին է ձեռք բերվում:

Իրավահարաբերության ծագման պահին գործող խմբագրությամբ Օրենքի 8-րդ հոդվածի 6-րդ մասի համաձայն՝ սույն հոդվածի 1-ին մասի 5-րդ կետի դեպքում համակենտրոնացման մասնակիցներ են համարվում իրավահարաբերության մասնակից տնտեսվարող սուբյեկտները:

Իրավահարաբերության ծագման պահին գործող խմբագրությամբ Օրենքի 9-րդ հոդվածի 1-ին մասի 1-ին կետի համաձայն՝ տնտեսվարող սուբյեկտների համակենտրոնացումը մինչև գործողության մեջ դնելը ենթակա է հայտարարագրման, եթե համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի որոշմամբ սահմանված ակտիվների կամ հասույթ(ներ)ի արժեքը (չափը):

Իրավահարաբերության ծագման պահին գործող խմբագրությամբ Օրենքի 10-րդ հոդվածի 4-րդ մասի 1-ին կետի համաձայն՝ արգելվում է հայտարարագրման ենթակա համակենտրոնացումը գործողության մեջ դնելը մինչև Հանձնաժողովի կողմից որոշում կայացնելը (չհայտարարագրված համակենտրոնացում):

Նույնաբովանդակ կարգավորումներ նախատեսված են նաև գործող խմբագրությամբ Օրենքի 13-րդ և 15-րդ հոդվածներում:

Վերոգրյալից հետևում է, որ օրենսդիրը որպես առանձին իրավախախտում սահմանել է չհայտարարագրված համակենտրոնացումը: Այսպես, համակենտրոնացումը Օրենքով սահմանված կարգով չհայտարարագրելը որպես իրավախախտում ձևական է և ավարտված է համարվում գործողության կատարման, վարքագծի դրսևորման պահից: Ընդ որում չհայտարարագրված համակենտրոնացման, ինչպես օրենսդրի կողմից իրավախախտում համարվող յուրաքանչյուր արարքի դեպքում որպես կանոն առկա է որևէ անձի կամ պետությանը պատճառված էական վնաս: Օրենքով նախատեսված, որպես իրավախախտում որակվող բոլոր գործողությունների և վարքագծի դրսևորումների դեպքում իրավախախտի կողմից պատճառված վնասը առկա է հաշվի առնելով Օրենքով կարգավորվող իրավահարաբերությունների բնույթը և Օրենքով պաշտպանվող հանրային շահը: Ընդ որում, վնասը առկա է անկախ այն հանգամանքից գործողության կամ վարքագծի դրսևորումն ինքնին համարվում է իրավախախտումը հաստատված համարելու համար բավարար, թե անհրաժեշտ է Օրենքով սահմանված կոնկրետ հետևանքի վրա հասնելու փաստ:

Միևնույն ժամանակ, Հանձնաժողովի՝ որպես ինքնավար մարմնի լիազորությունների պատշաճ իրականացմանը խոչընդոտող ցանկացած գործողություն կամ վարքագիծ, այդ թվում՝ համակենտրոնացումը Օրենքով սահմանված կարգով չհայտարարագրելը, ևս կարող են էական վնաս պատճառել: Այսինքն, որպես էական վնաս դիտարկվում են ոչ

միայն նյութական վնաս առաջացնող վարքագծի դրսևորումները, այլև հիմնարար նշանակություն ունեցող այլ արժեքներ (հանրային շահերի արդյունավետ պաշտպանության իրականացում, անձի պատիվ, արժանապատվություն, բարի համբավ և այլն) վտանգող գործողությունները և վարքագիծը: Որպես ոչ նյութական էական վնաս կարող է դիտարկվել Հանձնաժողովի կողմից որոշակի գործողությունների իրականացումը, որոնք տնտեսավարող սուբյեկտի կողմից Օրենքը չխախտելու դեպքում չէին ձեռնարկվի, կամ Հանձնաժողովը ավելի քիչ ռեսուրսներ կծախսեր իր առջև դրված նպատակների իրագործման համար և այլն:

Մասնավորապես՝ Օրենքով սահմանված համապատասխան պայմանների բավարարման դեպքում համակենտրոնացումը հայտարարագրելու օրենսդրական պահանջը ինքնանպատակ չէ, այն Հանձնաժողովի կարևոր կանխարգելիչ գործառույթներից է, որն ուղղակիորեն ապահովում է Հանձնաժողովի կողմից նախատեսվող գործարքի արդյունքում տեղի ունեցող փոփոխություններին տեղեկանալու, նախատեսվող գործարքի ազդեցությունը լիարժեք գնահատելու և բացասական ազդեցությունը կանխելու հնարավորությունը: Համակենտրոնացումը Օրենքով սահմանված կարգով չհայտարարագրելու դեպքում Հանձնաժողովը, ըստ էության, զրկվում է համակենտրոնացման ազդեցությունը նախապես (ex ante) գնահատելու հնարավորությունից, ինչն իր հերթին սահմանափակում է Հանձնաժողովի կողմից նշված կանխարգելիչ գործառույթի լիարժեք իրականացումը:

Վերոգրյալից հետևում է, որ համակենտրոնացումը Օրենքով սահմանված կարգով չհայտարարագրելը որպես իրավախախտում ինքնին կարող է էական վնաս պատճառել:

Այսպես, «Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից իրականացված համապատասխանաբար Գործարք 1-ը և Գործարք 2-ը Օրենքի իմաստով համարվում են համակենտրոնացում, քանի որ Գործարք 1-ի արդյունքում ֆիզիկական անձ Նորիկ Թորգոմի Պետրոսյանը 2019 թվականի դեկտեմբերի 20-ին դարձել է «Թեղուտ» ընկերության 25,05 տոկոս անուղղակի բաժնետեր և Գործարք 2-ի արդյունքում ֆիզիկական անձ Պավել Կորիչնևը 2020 թվականի փետրվարի 17-ին դարձել է «Թեղուտ» ընկերության 25,00 տոկոս անուղղակի բաժնետեր, Գործարք 1-ի և Գործարք 2-ի շնորհիվ ֆիզիկական անձինք Նորիկ Թորգոմի Պետրոսյանը և Պավել Կորիչնևը անուղղակիորեն կարող են ազդել «Թեղուտ» ընկերության որոշումների կայացման կամ մրցունակության վրա:

Միաժամանակ, «Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից իրականացված համապատասխանաբար Գործարք 1-ը և Գործարք 2-ը ենթակա են եղել հայտարարագրման, քանի որ Գործարք 1-ին և Գործարք 2-ին նախորդող ֆինանսական տարիների դրությամբ՝ «Թեղուտ» ընկերության ակտիվների արժեքը և հասույթի չափը գերազանցել են Հանձնաժողովի Թիվ 322-Ն որոշման հավելված 1-ով սահմանված ակտիվների արժեքը և հասույթի չափը:

Ընդ որում Օրենքը չի սահմանում որևէ բացառություն գործարքների՝ ՀՀ սահմաններից կնքված լինելու դեպքերում, հետևաբար համակենտրոնացման ենթակա

գործարքների կնքումը ՀՀ սահմաններից դուրս որևէ կերպ չի կարող ազատել հայտարարագրման օրենսդրական պարտականությունից:

Հաշվի առնելով վերոգրյալը՝ Հանձնաժողովը հաստատված է համարում «Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից իրավախախտում կատարված լինելը, մասնավորապես համակենտրոնացման մասնակիցների կողմից հայտարարագրման ենթակա համակենտրոնացումները մինչև գործողության մեջ դնելը չհայտարարագրելը, որի կապակցությամբ օրենսդրությամբ նախատեսված է իրավական հետևանք՝ պատասխանատվության միջոցի կիրառում:

2) Համակենտրոնացման արգելման ենթակա չլինելու հարցի կապակցությամբ.

Իրավահարաբերության ծագման պահին գործող խմբագրությամբ Օրենքի 8-րդ հոդվածի 7-րդ մասի համաձայն՝ Օրենքի իմաստով համակենտրոնացումը կայացվում է՝

1) միևնույն ապրանքային շուկայում (հորիզոնական համակենտրոնացում),

2) որոշակի փոխկապակցվածություն ունեցող տարբեր ապրանքային շուկաներում (ուղղահայաց համակենտրոնացում), և

3) տարբեր ապրանքային շուկաներում (խառը համակենտրոնացում):

Գործարք 1-ի իրավահարաբերության ծագման պահին գործող խմբագրությամբ Օրենքի 10-րդ հոդվածի 4-րդ մասի 2-րդ կետի համաձայն՝ արգելվում է հայտարարագրման ենթակա համակենտրոնացումը գործողության մեջ դնելը Հանձնաժողովի կողմից համակենտրոնացումն արգելելու վերաբերյալ որոշում կայացնելու դեպքում (արգելված համակենտրոնացում):

Օրենքի 73-րդ հոդվածի 2-րդ մասի 1-ին կետի համաձայն՝ հայտարարագրման ենթակա համակենտրոնացումը համարվում է արգելված, եթե՝ այն գործողության մեջ է դրվել առանց Հանձնաժողովի՝ համակենտրոնացումը թույլատրելու մասին որոշման, և հետագայում Հանձնաժողովն ամրագրել է, որ այն ենթակա է արգելման:

Օրենքի 70-րդ հոդվածի 1-ին մասի համաձայն՝ Հանձնաժողովն արգելում է հայտարարագրման ենթակա համակենտրոնացումը, եթե՝

1) Հանձնաժողովի ուսումնասիրությունների արդյունքների համաձայն՝ համակենտրոնացման հետևանքով կանխվելու, սահմանափակվելու, արգելվելու կամ այլ կերպ վատթարանալու է տնտեսական մրցակցությունը համապատասխան ապրանքային շուկայում, կամ

2) Հանձնաժողովի ուսումնասիրությունների արդյունքների համաձայն՝ համակենտրոնացումը հանգեցնելու է գերիշխող դիրքի առաջացմանը կամ ամրապնդմանը, կամ

3) Հանձնաժողովի ուսումնասիրությունների արդյունքների համաձայն՝ համակենտրոնացման հետևանքով վնասվելու են սպառողների շահերը:

Վերոնշյալ նորմերի վերլուծությունից հետևում է, որ եթե չհայտարարագրված համակենտրոնացումը հանգեցրել է համապատասխան ապրանքային շուկայում մրցակցության կանխման, սահմանափակման, արգելման կամ այլ կերպ վատթարացման կամ սպառողների շահերի վնասման, առաջացրել կամ ամրապնդել է գերիշխող դիրքը, ապա այդ համակենտրոնացումը համարվում է արգելված համակենտրոնացում:

Այսպիսով՝ օրենսդիրը տարանջատում է երկու առանձին իրավախախտում արգելված համակենտրոնացումն ու չհայտարարագրված համակենտրոնացումը: Այն դեպքում, երբ Հանձնաժողովի ուսումնասիրությունների արդյունքում չհայտարարագրված համակենտրոնացումը հանգեցրել է համապատասխան ապրանքային շուկայում մրցակցության կանխման, սահմանափակման, արգելման կամ այլ կերպ վատթարացման կամ սպառողների շահերի վնասման, առաջացրել կամ ամրապնդել է գերիշխող դիրքը, այսինքն՝ առկա են Օրենքի 70-րդ հոդվածով սահմանված հիմքերը, ապա այդ համակենտրոնացումը Հանձնաժողովի որոշմամբ կհամարվի արգելված համակենտրոնացում, իսկ նշված հանգամանքների բացակայության պայմաններում իրավախախտումը դրսևորվում է միայն առանց համակենտրոնացումը թույլատրելու մասին որոշման այն գործողության մեջ դնելով:

1. Գործարք 1-ի կապակցությամբ

Տվյալ պարագայում՝ ֆիզիկական անձ Նորիկ Թորգոմի Պետրոսյանի կողմից 2019 թվականի դեկտեմբերի 20-ին «Թեղուտ» ընկերության 25,05 տոկոս անուղղակի բաժնետեր դառնալու գործարքը մինչև գործողության մեջ դնելը հայտարարագրվելու դեպքում ենթակա կլիներ գնահատման որպես խառը համակենտրոնացում, հաշվի առնելով այն հանգամանքը, որ Գործարք 1-ի իրականացման պահի դրությամբ համակենտրոնացման մասնակից ֆիզիկական անձ Նորիկ Թորգոմի Պետրոսյանի հետ փոխկապակցված

և «Թեղուտ» ընկերությունը (իրականացնում է պղնձի հանքաքարեր և խտահանքերի, մոլիբդենի խտանյութի արտադրություն և իրացում) գործում են տարբեր ապրանքային շուկաներում :

2. Գործարք 2-ի կապակցությամբ

Տվյալ պարագայում՝ ֆիզիկական անձ Պավել Կորիչնևի կողմից 2020 թվականի փետրվարի 17-ին «Թեղուտ» ընկերության 25,00 տոկոս անուղղակի բաժնետեր դառնալու գործարքը մինչև գործողության մեջ դնելը հայտարարագրվելու դեպքում ենթակա կլիներ գնահատման որպես խառը համակենտրոնացում, քանի որ ֆիզիկական անձ Պավել Կորիչնևի կողմից Հայաստանի Հանրապետությունում այլ ընկերությունների հետ փոխկապակցվածություն, կանոնադրական (բաժնեհավաք) կապիտալում մասնակցություն առկա չէ:

Այսպիսով, Հանձնաժողովը գտնում է, որ Գործարք 1-ը և Գործարք 2-ը, որոնք ենթակա են եղել հայտարարագրման, արգելված համակենտրոնացումներ չեն:

3) «Թեղուտ» փակ բաժնեդիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի նկատմամբ պաշտասխանադրության միջոց կիրառելու հարցի կապակցությամբ

Օրենքի 92-րդ հոդվածի 1-ին մասի համաձայն՝ տնտեսական մրցակցության բնագավառում իրավախախտման համար Հանձնաժողովն իրավասու է տնտեսավարող սուբյեկտներին, պետական մարմիններին և դրանց պաշտոնատար անձանց տալու նախազգուշացում կամ նշանակելու տուգանք:

Օրենքի 93-րդ հոդվածի 5-րդ մասի համաձայն՝ համակենտրոնացումը չհայտարարագրելու համար նշանակվող տուգանքի չափը կազմում է մինչև հինգ միլիոն դրամ:

Օրենքի 94-րդ հոդվածի 1-ին մասի համաձայն՝ պատասխանատվության միջոց կիրառելիս Հանձնաժողովը հաշվի է առնում տվյալ իրավախախտման բնույթը, տևողությունը, իրավախախտման հնարավոր կամ փաստացի ազդեցությունը շուկայում մրցակցային իրավիճակի կամ սպառողների շահերի վրա, տնտեսավարող սուբյեկտի կողմից տվյալ խախտման կրկնակիությունը, եթե նախորդ խախտման համար պատասխանատվության միջոց կիրառելու օրվանից չի անցել հինգ տարի, տնտեսավարող սուբյեկտի դիտավորության աստիճանը, տնտեսավարող սուբյեկտի կողմից իրավախախտում կատարվելու շարժառիթները և հանգամանքները, տնտեսավարող սուբյեկտի կողմից իրավախախտում կատարվելու փաստն ընդունելու կամ Հանձնաժողովի հետ համագործակցելու հանգամանքը, պատասխանատվությունից ազատելու հիմքերը, տնտեսավարող սուբյեկտի վրա նշանակվող տուգանքի հնարավոր ազդեցությունը, տվյալ տնտեսավարող սուբյեկտի գործունեության ոլորտը և տնտեսավարող սուբյեկտի պատմությունը:

Հանձնաժողովի 2021 թվականի դեկտեմբերի 28-ի «Պատասխանատվության միջոցի ընտրության և տուգանքի հաշվարկման մեթոդաբանությունը սահմանելու մասին» թիվ 395-Ն որոշման (այսուհետ նաև՝ **Թիվ 395-Ն որոշում**) հավելվածով սահմանված պատասխանատվության միջոցի ընտրության և տուգանքի հաշվարկման մեթոդաբանության (այսուհետ նաև՝ **Մեթոդաբանություն**) 9-րդ կետի համաձայն՝ տուգանքը հաշվարկվում է $S = P + P \times (D - U)$ բանաձևով, որտեղ՝ S-ն տուգանքի չափն է, P-ն տուգանքի բազային գումարն է, D-ն բոլոր ծանրացնող հանգամանքների համար սահմանված տոկոսների հանրագումարն է, U-ն բոլոր մեղմացնող հանգամանքների համար սահմանված տոկոսների հանրագումարն է:

Բազային գումարի հաշվարկը.

Մեթոդաբանության 9-րդ կետի 4-րդ ենթակետի «ա» պարբերության համաձայն՝ չորրորդ խումբ իրավախախտումների դեպքում կիրառվող մեթոդը վերաբերում է համակենտրոնացման չհայտարարագրմանը: Մեթոդաբանության 27-րդ կետի համաձայն՝ չորրորդ խումբ իրավախախտումների դեպքում տուգանքի բազային գումարը Մեթոդաբանության 11-րդ կետի 4-րդ ենթակետի «ա», «բ», «գ», «դ» պարբերություններում նախատեսված իրավախախտումների համար հավասար է 2 000 000 ՀՀ դրամ:

Պատասխանատվությունը ծանրացնող և մեղմացնող հանգամանքներ.

Մեթոդաբանության 35-36-րդ կետերով և 41-42-րդ կետերով սահմանված են չորրորդ խումբ իրավախախտումների դեպքում պատասխանատվությունը ծանրացնող և մեղմացնող հանգամանքները, ինչպես նաև սահմանված են բազային գումարը ծանրացնող և մեղմացնող հանգամանքների հաշվարկման դրույքաչափերը:

Մեթոդաբանության 43-րդ կետի համաձայն՝ Հանձնաժողովը դիտարկում ու վարչական ակտում արտացոլում է միայն այն ծանրացնող և մեղմացնող հանգամանքները, որոնք հաստատվել են համապատասխան վարույթի ընթացքում:

Մեթոդաբանության 44-րդ կետի համաձայն՝ մեղմացնող հանգամանքի առկայության ապացուցման բեռը կրում է վարույթով պատասխանողը:

«Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի մասով Հանձնաժողովի կողմից ծանրացնող և մեղմացնող որևէ հանգամանք չի հայտնաբերվել և չի հաստատվել:

Գործարք 1-ով տուգանքի հաշվարկը.

Վերոշարադրյալից հետևում է, որ Գործարք 1-ի համար «Թեղուտ» ընկերության նկատմամբ տուգանքի չափը կազմում է 2 000 000 ՀՀ դրամ՝ համաձայն հետևյալ հաշվարկի.

$$S = P + P \times (\% - U) = 2\,000\,000 + 2\,000\,000 \times (0\% - 0\%) = 2\,000\,000 \text{ ՀՀ դրամ:}$$

Գործարք 1-ի համար ֆիզիկական անձինք Նորիկ Թորգոմի Պետրոսյանի նկատմամբ տուգանքի չափը կազմում է 2 000 000 ՀՀ դրամ՝ համաձայն հետևյալ հաշվարկի.

$$S = P + P \times (\% - U) = 2\,000\,000 + 2\,000\,000 \times (0\% - 0\%) = 2\,000\,000 \text{ ՀՀ դրամ:}$$

Այսպիսով, Գործարք 1-ի համար «Թեղուտ» ընկերության նկատմամբ նշանակվող տուգանքի չափը կազմում է 2 000 000 ՀՀ դրամ:

Գործարք 1-ի համար ֆիզիկական անձ Նորիկ Թորգոմի Պետրոսյանի նկատմամբ նշանակվող տուգանքի չափը կազմում է 2 000 000 ՀՀ դրամ:

Գործարք 2-ով տուգանքի հաշվարկը.

Գործարք 2-ի համար «Թեղուտ» ընկերության նկատմամբ տուգանքի չափը կազմում է 2 000 000 ՀՀ դրամ՝ համաձայն հետևյալ հաշվարկի.

$$S = P + P \times (\% - U) = 2\,000\,000 + 2\,000\,000 \times (0\% - 0\%) = 2\,000\,000 \text{ ՀՀ դրամ:}$$

Գործարք 2-ի համար ֆիզիկական անձինք Պավել Կորիչնևի նկատմամբ տուգանքի չափը կազմում է 2 000 000 ՀՀ դրամ՝ համաձայն հետևյալ հաշվարկի.

$$S = P + P \times (\% - U) = 2\,000\,000 + 2\,000\,000 \times (0\% - 0\%) = 2\,000\,000 \text{ ՀՀ դրամ:}$$

Այսպիսով, Գործարք 2-ի համար «Թեղուտ» ընկերության նկատմամբ նշանակվող տուգանքի չափը կազմում է 2 000 000 ՀՀ դրամ:

Գործարք 1-ի համար ֆիզիկական անձ Պավել Կորիչնևի նկատմամբ նշանակվող տուգանքի չափը կազմում է 2 000 000 ՀՀ դրամ:

Այսպիսով, հաշվի առնելով վերոնշյալ հանգամանքները և հիմք ընդունելով Հանձնաժողովի Թիվ 395-Ն որոշումը, Հանձնաժողովն արձանագրում է, որ Գործարք 1-ը և Գործարք 2-ը չհայտարարագրելու համար «Թեղուտ» ընկերության նկատմամբ անհրաժեշտ է նշանակել տուգանք՝ ընդհանուր 4 000 000 ՀՀ դրամի չափով, Գործարք 1-ը չհայտարարագրելու համար ֆիզիկական անձ Նորիկ Թորգոմի Պետրոսյանի նկատմամբ անհրաժեշտ է նշանակել տուգանք 2 000 000 ՀՀ դրամի չափով և Գործարք 2-ը չհայտարարագրելու համար ֆիզիկական անձ Պավել Կորիչնևի նկատմամբ անհրաժեշտ է նշանակել տուգանք՝ 2 000 000 ՀՀ դրամի չափով:

4) «Թեղուտ» փակ բաժնետիրական ընկերությանը և ֆիզիկական անձինք Նորիկ Թորգոմի Պետրոսյանին ու Պավել Կորիչնևին հանձնարարություն տալու հարցի կապակցությամբ.

Օրենքի 37-րդ հոդվածի 1-ին մասի 3-րդ կետի համաձայն՝ Հանձնաժողովը սույն օրենքը խախտելու համար տնտեսավարող սուբյեկտներին, պետական մարմիններին և նրանց պաշտոնատար անձանց ենթարկում է պատասխանատվության՝ հանձնարարելով իր սահմանած ժամկետում շտկել խախտումը և հետագայում բացառել այն:

Տվյալ դեպքում, Հանձնաժողովի կողմից կատարված ուսումնասիրությունների արդյունքում արձանագրվել է, որ «Թեղուտ» ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի կողմից կատարված իրավախախտումները չհայտարարագրված համակենտրոնացում են, ինչպես նաև արգելված համակենտրոնացման հատկանիշներ չեն պարունակում, հետևաբար հանձնարարություն տալու անհրաժեշտությունը բացակայում է:

7. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 37-րդ հոդվածի 1-ին մասի 3-րդ կետով, 67-րդ հոդվածի 2-րդ մասով, 100-րդ հոդվածի 2-րդ մասով, «Վարչարարության հիմունքների և վարչական վարույթի մասին» օրենքի 70-րդ և 71-րդ հոդվածներով, Հայաստանի Հանրապետության վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը

Ո Ր Ո Շ Ե Ց

1. «Թեղուտ» փակ բաժնետիրական ընկերության և ֆիզիկական անձ Նորիկ Թորգոմի Պետրոսյանի 2019 թվականի դեկտեմբերի 20-ի համակենտրոնացումը չհայտարարագրելը որակել որպես չհայտարարագրված համակենտրոնացում:

2. «Թեղուտ» փակ բաժնետիրական ընկերության և ֆիզիկական անձ Պավել Կորիչնևի 2020 թվականի փետրվարի 17-ի համակենտրոնացումը չհայտարարագրելը որակել որպես չհայտարարագրված համակենտրոնացում:

3. Սույն որոշման 1-ին կետում նշված խախտման համար «Թեղուտ» փակ բաժնետիրական ընկերության նկատմամբ նշանակել 2 000 000 (երկու միլիոն) ՀՀ դրամի չափով տուգանք:

4. Սույն որոշման 1-ին կետում նշված խախտման համար ֆիզիկական անձ Նորիկ Թորգոմի Պետրոսյանի նկատմամբ նշանակել 2 000 000 (երկու միլիոն) ՀՀ դրամի չափով տուգանք:

5. Սույն որոշման 2-րդ կետում նշված խախտման համար «Թեղուտ» փակ բաժնետիրական ընկերության նկատմամբ նշանակել 2 000 000 (երկու միլիոն) ՀՀ դրամի չափով տուգանք:

6. Սույն որոշման 2-րդ կետում նշված խախտման համար ֆիզիկական անձ Պավել Կորիչնևի նկատմամբ նշանակել 2 000 000 (երկու միլիոն) ՀՀ դրամի չափով տուգանք:

7. Սույն որոշումը «Թեղուտ» փակ բաժնետիրական ընկերության և ֆիզիկական անձինք Նորիկ Թորգոմի Պետրոսյանի ու Պավել Կորիչնևի նկատմամբ յուրաքանչյուրի մասով ուժի մեջ է մտնում դրա պատճենը համապատասխանաբար «Թեղուտ» փակ բաժնետիրական ընկերությանը և ֆիզիկական անձինք Նորիկ Թորգոմի Պետրոսյանին ու Պավել Կորիչնևին հանձնելուն հաջորդող օրվանից:

8. Սույն որոշման 3-րդ, 4-րդ, 5-րդ և 6-րդ կետերը դրանցով նշանակված տուգանքը մինչև սույն որոշման անբողոքարկելի դառնալը չվճարվելու դեպքում ենթակա են հարկադիր կատարման՝ «Դատական ակտերի հարկադիր կատարման մասին» օրենքով սահմանված կարգով:

9. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու օրվանից երկամսյա ժամկետում:

10. Սույն որոշման բողոքարկումը չի կասեցնում դրա գործողությունը կամ կատարումը:

ՆԱԽԱԳԱՀ

2023 թ. սեպտեմբերի 20
Երևան



Գ. ԳՎՈՐԳՅԱՆ

